



UNIVERSITÄTS-
BIBLIOTHEK
PADERBORN

**Ethica Symbolica E Fabularum Umbris In Veritatis Lucem
Varia Ervditione Noviter evoluta**

Pexenfelder, Michael

Monachii, 1675

1. Indoles magnanima.

[urn:nbn:de:hbz:466:1-68709](https://nbn-resolving.org/urn:nbn:de:hbz:466:1-68709)

Insequitur abeuntes iratus pater; hunc ut à via divertat Medea, *Abfyrum* fratrem, etiamnum puerum (quem secum fugæ comitem in hæc consilia traxerat) membratim conscindit & laniat: inque diversas spargit partes, ut scilicet persequentem regem obiectis laceri filii artibus averteret, & dum is se colligendis pueri membris detinet, effugiendi spatium inveniret. Successit crudelis dolus; patrem remoratur pietas; Medea cum Argonautis in Thessaliam, Jasonis patriam defertur, quæ heroas inclytos, post tot ac tantarum rerum gestam gloriam, immortalitatis famæ decoratos, læta & gratulabunda excepit.

Cæterum origo velleris aurei hæc fuit. *Phryxus* Athamantis Thessalorum regis, & Nephelæ filius, unà cum sorore *Helle*, defuncta matre, infidias Inus noveræ metuens, ariete conscenso, qui aureo vellere, lanatus, Pontum ex ea, quæ angustior erat parte, sublimis in aëre trajicere cœpit. *Helle* undarum territa strepitu in Pontum decidit, & submersa est; unde factum, ut pars illa maris deinceps *Hellisponti* nomen obtineret, *Phryxus* incolumis in Colchidem ad regem *Æetam* pervenit; à quo benignè exceptus, arietem Jovi, vel, ut aliqui volunt, Marti immolavit, & aureas illius exuvias in luco iis diis sacro suspendit. Aries verò vector inter sidera locatus, pristinam tenuit effigiem, atque à *Phryxo* *Phryxæus* est appellatus.

Ethica.

I. (a) Quòd ingentia pericula in navigatione Colchica exantlanda, inque auferendo vellere aureo horrenda discrimina proposita, Jasonem nec à profectioe, nec ab aggressionem monstrorum abstergere quiverint, ostenditur, animum & bonitate naturæ præstantem, & virtutibus insigniter imbutum (id quod Jason instructori suo *Chironi* debebat) laudabilique gloriæ cupiditate incensum, nihil sapere humile, nihil abiectum; quin potiùs ipsis difficultatibus exacui, & ad fortiter, etsi periculose, faciendum, inflammari. Habent hoc sublimes spiritus; per Templum *Virtutis* ad ædem *Honoris* ascendere solent. Jason ubique victor, demonstrat, virtuti & magnanimitati omnia cedere, omnia pervia esse; nec quidquam tam arduum, quod non constanti, improbòque labore, animique firmitate attingere, tuique juris facere possis. Avida, inquit Seneca, est periculi virtus, & quò tendat, non quid passura sit, cogitat, marcet sine adversario; crescit in adversis. Et Ovidius:

Apparet virtus, arguiturque malis.

Silius :

(a) *Indoles magnamina,*

Silius :

----- Explorant adversa viros.

Et Seneca Tragœdus :

Virtutis est domare, quæ cuncti pavent

Nam Philosopho Romano teste : Non quia difficilia sunt, multa non audemus : sed quia non audemus, difficilia sunt.

II. (b) Sed tamen sine Medæ consilio, nihil præstitit Æsonides noster. Horatius canit, *Mole ruit sua, vis consilii expers.* Hoc per Medeam significatur ; est enim *μῆδος cura, consilium*, à *μῆ-δουα* curam gero, delibero, meditor, provideo, prospicio. Sine consilio & ratione prudenti impetus omnis, etiam in honestissimis caloribus, in ventos effunditur. Temeritas, inquit Curtius lib. 4. ubi primum effudit impetum, veluti quædam animalia, amisso aculeo, torpet. Et licet initio felicitas aspirare videatur, ad ultimum tamen temeritati non sufficit. *Medea* ergo jungenda *Iasoni*, & *Diomedis* sociandus *Ulysses*. Nulla sine sapientia fortitudo; vacillant vires, nisi consilio fulciantur. Etiam bestię ruunt in pugnas, sed cæcas. S. August. epist. ad Hieron. Qui vera virtute fortis est, nec temerè audet, nec inconsultò timet.

III. (c) Calcar ad virtutem erant Iasoni præmia, juxta Poëtam :

----- Quis enim virtutem amplectitur ipsam.

Præmia si tollas ?

Et alius ?

----- Laudatæque virtus

Crescit, & immensum gloria calcar habet,

Delectet, inquit D. Gregorius hom. 17. in Evang. mentem magnitudo præmiorum, sed non deterreat certamen laborum. Iasone Duce, Virtute Comite, Gloria Auspice, fortissimi quique Græciæ juvenes, Argivæ robora pubis, & heroum genus, ut Catullus loquitur, incitati sunt ad fortitudinis eximium Decus longinquis è terris per mille pericula quærendum. Tanti est, incitamentum laboris ab exemplo & præmiis sumere. Iasonem imitatus est Philippus cognomento *Bonus*, Burgundiæ Rex, & Dux Brabantia, qui anno Christi 1429. (d) Ordinem ac Societatem Equestrem instituit, è viris nobilitate & opibus, clarissimis, quam *Aurei Velleris* appellavit. Illius insigne: Torques aureus, cum ignitabuli figura, scintillas de filice excutientis, dependente imagine sive Arietis Phrixæi, sive Agni Gedeonici, cum inscriptione : *Præmium non vile laborum.* Munus enim & partes horum sunt magnatum, Catholicam fidem armis tueri ac propagare, Christianæ

(b) Virtutis comes Prudentia (c) Calcar virtutis sunt præmia. (d) aurei velleris ordo.